



Rasa Sunyi Dalam Kalangan Remaja : Satu Kajian Literatur Sistematik

Saraswathy Murugan^{1,2} dan Syawal Amran¹,

¹Fakulti Pendidikan Universiti Kebangsaan Malaysia

²Sekolah Menengah Kebangsaan Tinggi Perempuan Melaka

Date of Submission: 07-05-2026

Date of Acceptance: 17-05-2026

Abstrak

Kesunyian dalam kalangan remaja semakin diiktiraf sebagai isu kesihatan mental global yang signifikan, khususnya selepas perubahan sosial sejak tahun 2020. Walaupun bilangan kajian berkaitan kesunyian remaja semakin meningkat, bukti empirikal masih terfragmentasi dari segi faktor penentu dan kecenderungan metodologi penyelidikan. Kajian ini bertujuan mengenal pasti faktor yang dikaitkan dengan kesunyian remaja serta menganalisis corak reka bentuk kajian dalam literatur terkini. Kajian ini menggunakan pendekatan Sistemik Literature Review (SLR) berpandukan garis panduan PRISMA 2020. Carian literatur dijalankan dalam pangkalan data Scopus, Web of Science, PubMed dan Google Scholar bagi artikel yang diterbitkan antara tahun 2020 hingga 2025. Sebanyak 20 artikel yang memenuhi kriteria inklusi dianalisis menggunakan sintesis tematik dan analisis deskriptif.

Dapatan menunjukkan bahawa hubungan sosial dan rakan sebaya merupakan faktor paling dominan (40%), diikuti hubungan antara kesunyian dan masalah kesihatan mental seperti kemurungan dan kebimbangan (25%). Faktor keluarga berfungsi sebagai faktor perlindungan (20%), manakala faktor individu seperti ciri personaliti dan kerentanan psikologi menyumbang 15%. Selain itu, sekitar 10% kajian menekankan perubahan interaksi sosial dalam konteks pasca-COVID yang mempengaruhi pengalaman kesunyian remaja. Dari segi metodologi, reka bentuk longitudinal merupakan pendekatan paling dominan (30%), diikuti kajian keratan rentas (25%), manakala selebihnya melibatkan pendekatan kualitatif dan analisis lanjutan.

Walau bagaimanapun, literatur semasa masih menunjukkan beberapa jurang penyelidikan, khususnya dominasi kajian keratan rentas, keterbatasan kajian kualitatif serta kekurangan penyelidikan dalam konteks budaya bukan Barat. Oleh itu, kajian masa hadapan disarankan memberi tumpuan kepada reka bentuk longitudinal jangka panjang, memperluaskan penyelidikan dalam konteks budaya tempatan termasuk Malaysia, serta membangunkan intervensi berasaskan sekolah dan

keluarga bagi menyokong kesejahteraan mental remaja.

Kata kunci: kesunyian remaja, kesihatan mental, hubungan rakan sebaya, systematic literature review, kesejahteraan psikologi.

Pengenalan

Kesunyian semakin diiktiraf sebagai salah satu cabaran kesihatan mental global yang memberi implikasi signifikan terhadap kesejahteraan psikologi individu merentas peringkat umur. Dalam konteks psikologi sosial, rasa sunyi (loneliness) merujuk kepada pengalaman emosi subjektif yang berlaku apabila individu merasakan jurang antara hubungan sosial yang diinginkan dengan hubungan sosial yang sebenar dimiliki (Lim et al., 2020; Buecker & Horstmann, 2021). Keadaan ini tidak semestinya berkait dengan kesendirian fizikal, sebaliknya berpunca daripada persepsi bahawa keperluan emosi dan sosial individu tidak dipenuhi secara bermakna (Lim et al., 2020). Rasa sunyi lazimnya dicirikan oleh perasaan keterasingan, kesedihan dan kekurangan sokongan emosi, walaupun individu mempunyai interaksi sosial yang kerap (Loades et al., 2020).

Dalam konteks kesihatan mental, rasa sunyi dikenal pasti sebagai faktor risiko yang signifikan terhadap pelbagai masalah psikologi. Kajian menunjukkan bahawa individu yang mengalami kesunyian kronik mempunyai risiko lebih tinggi untuk mengalami kemurungan dan gangguan kebimbangan berbanding individu yang mempunyai hubungan sosial yang memuaskan (Erzen & Çikrikci, 2018; Lim et al., 2020).

Di peringkat global, World Health Organization (WHO) melaporkan bahawa sekitar 16% populasi dunia mengalami kesunyian, menjadikannya satu isu kesihatan awam yang serius (WHO, 2023). WHO turut menegaskan bahawa kesunyian dan pengasingan sosial berkait secara langsung dengan peningkatan risiko kemurungan, kebimbangan, tekanan psikologi dan kemerosotan fungsi sosial (WHO, 2023).

Isu kesunyian menjadi lebih membimbangkan dalam kalangan remaja kerana fasa ini merupakan tempoh



perkembangan kritikal yang sangat bergantung kepada kualiti hubungan sosial dan sokongan emosi. Bukti empirikal menunjukkan bahawa remaja yang mengalami kesunyian berisiko tinggi untuk mengalami masalah kesihatan mental, termasuk kebimbangan dan kemurungan (Loades et al., 2020). Sejak tahun 2020, perubahan corak interaksi sosial dan peningkatan penggunaan teknologi digital telah mengubah cara remaja membina hubungan sosial, namun perubahan ini tidak semestinya mengurangkan kesunyian dan dalam sesetengah keadaan menyumbang kepada kesejahteraan mental yang lebih rendah (Buecker & Horstmann, 2021).

Dalam konteks Malaysia, dapatan National Health and Morbidity Survey (NHMS) 2022 menunjukkan bahawa 16.2% remaja melaporkan sering atau sentiasa berasa sunyi (Institute for Public Health [IPH], 2022). Laporan yang sama turut menunjukkan bahawa 26.9% remaja mengalami simptom kemurungan, yang dikenal pasti mempunyai hubungan signifikan dengan faktor kesunyian dan kekurangan sokongan sosial (IPH, 2022).

Walaupun bilangan kajian berkaitan kesunyian dalam kalangan remaja meningkat sejak tahun 2020, literatur sedia ada masih terfragmentasi dari segi kerangka teori, pendekatan metodologi dan konteks kajian. Kekurangan sintesis yang menyeluruh ini menyukarkan pemahaman terhadap pola penyelidikan semasa dan pengenalpastian jurang kajian yang konsisten. Oleh itu, pelaksanaan Systematic Literature Review (SLR) adalah diperlukan bagi mensintesis bukti empirikal terkini secara sistematik dan mengenal pasti jurang penyelidikan yang signifikan bagi menyokong pembangunan intervensi dan penyelidikan masa hadapan (Matthews et al., 2022).

Objektif Kajian

Kajian ini bertujuan untuk:

1. Mengenal pasti faktor-faktor yang dikaitkan dengan kesunyian dalam kalangan remaja berdasarkan literatur terkini
2. Menganalisis reka bentuk kajian yang digunakan dalam penyelidikan berkaitan kesunyian remaja bagi memahami kecenderungan metodologi semasa.

Sorotan Literatur

Kesunyian remaja ditakrifkan sebagai jurang yang dirasakan antara hubungan sosial yang diinginkan dengan hubungan sosial yang dimiliki, dan ia boleh berlaku walaupun interaksi sosial wujud jika hubungan tersebut tidak memenuhi keperluan emosi (Lim et al., 2020; Buecker & Horstmann, 2021).

Dalam fasa perkembangan remaja, kesunyian berkait rapat dengan rasa kebersamaan (belongingness) di sekolah dan komuniti rakan sebaya yang mempengaruhi penyesuaian psikologi (Arslan, 2020). Literatur pasca-2020 memperlihatkan lonjakan kajian yang meneliti kesunyian remaja dalam konteks gangguan sosial dan perubahan rutin pendidikan, dengan penekanan kepada corak perubahan kesunyian merentas masa menggunakan reka bentuk longitudinal dan analisis trajektori (Loades et al., 2020; Houghton et al., 2022; Hunter et al., 2024). Kajian trajektori menunjukkan kesunyian bukan fenomena seragam, sebaliknya wujud subkumpulan remaja dengan pola kesunyian berbeza yang berkaitan dengan risiko kesejahteraan yang berlainan (Hunter et al., 2024; Wang et al., 2024). Dari aspek determinan, bukti menonjolkan peranan faktor psikososial dan keluarga, khususnya kualiti hubungan rakan sebaya serta sokongan ibu bapa sebagai pelindung terhadap kesunyian dan tekanan psikologi (Cooper et al., 2021; Humenny, 2021). Faktor individu juga relevan, apabila ciri personaliti tertentu dan simptom psikologi sedia ada meningkatkan kerentanan terhadap kesunyian berpanjangan (Gniewosz et al., 2023; Thakur et al., 2023). Dalam konteks digital, dapatan menunjukkan hubungan penggunaan media sosial dengan kesihatan mental remaja adalah bercampur dan bergantung kepada corak penggunaan serta mekanisme seperti perbandingan sosial, bukan sekadar kekerapan penggunaan (Keles et al., 2020; Vidal et al., 2020; Lim, 2022).

Secara konsisten, kesunyian dikaitkan dengan indikator kesihatan mental yang lebih buruk, termasuk kemurungan, kebimbangan dan kesejahteraan mental yang rendah, dan bukti longitudinal menunjukkan kesan ramalan kesunyian terhadap risiko psikologi pada fasa perkembangan seterusnya (Farrell et al., 2023; Grygiel et al., 2024; Parlikar et al., 2025). Walaupun demikian, literatur masih menunjukkan kelemahan utama pada tahap bukti, termasuk dominasi reka bentuk keratan rentas, variasi instrumen pengukuran, dan kekurangan kajian intervensi yang diuji secara ketat (Keles et al., 2020; Eccles & Qualter, 2021; Farrell et al., 2023). Jurang ini lebih ketara dalam konteks bukan Barat, termasuk Malaysia, walaupun data populasi dan kajian tempatan menunjukkan isu kesunyian remaja berkait dengan simptom kemurungan dan memerlukan pemahaman yang lebih sensitif budaya serta intervensi berasaskan sekolah dan keluarga (Institute for Public Health [IPH], 2022; Singh et al., 2023).

Reka Bentuk Kajian




Analisis Data dan hasil kajian

Jadual 2


Bil	Pengarang (Tahun)	Negara	Populasi	Reka Bentuk Kajian	Faktor yang Dikaji	Dapatan Berkaitan Kesunyian
1	Loades et al. (2020)	UK/Global	Kanak-kanak & remaja	Systematic Review	Pengasingan sosial	Kesunyian meningkat risiko kemurungan & kebimbangan
2	Vidal et al. (2020)	Global	Remaja	Pemerhatian	Media sosial	Kesunyian berkait dengan tekanan psikologi
3	Keles et al. (2020)	Global	Remaja	Pemerhatian	Penggunaan media sosial	Hubungan dengan simptom dalaman
4	Cooper et al. (2021)	UK	11–16 tahun	Longitudinal	Hubungan ibu bapa	Keakraban ibu bapa faktor perlindungan
5	Twenge et al. (2021)	37 negara	15–16 tahun	Analisis sekunder (PISA)	Kesunyian sekolah	Afek negatif & kepuasan hidup rendah
6	Humenny (2021)	Eropah	Remaja awal	Analisis laluan	Status rakan sebaya	Kesunyian memediasi kemurungan
7	Myhr et al. (2021)	Norway	Remaja	Perbandingan rentas masa	Faktor sosiodemografi	Perubahan kesejahteraan mental
8	Kayaoglu & Bascillar (2022)	Turki	Remaja	Keratan rentas	Kemurungan	Hubungan signifikan
9	Houghton et al. (2022)	Australia/UK	Remaja	Longitudinal (trajektori)	Penutupan sekolah	Subset remaja alami peningkatan kesunyian
10	Thakur et al. (2023)	AS	Remaja	Prospektif	Simptom awal	Simptom pra-pandemik meramal kesunyian
11	Farrell et al. (2023)	Global	Kanak-kanak & remaja	Systematic Review	Prevalens & kesejahteraan	Kesunyian ↔ kesejahteraan rendah
12	Gniewosz et al. (2023)	Jerman	Remaja	Longitudinal	Personaliti	Neurotisme meningkatkan kesunyian
13	Singh et al. (2023)	Malaysia	Remaja awal	Keratan rentas	Simptom kemurungan	Hubungan signifikan
14	Hunter et al. (2024)	UK	Remaja	Longitudinal (trajektori)	Dimensi kesunyian	Trajektori meramal kemurungan
15	Wang et al. (2024)	China	Remaja	Longitudinal	Faktor emosi & rakan sebaya	Kesan berbeza mengikut trajektori
16	Schutz et al. (2024)	Jerman	11–17 tahun	Tinjauan populasi	Risiko & sumber	Lonjakan pasca-pandemik
17	Turner et al. (2024)	UK	Remaja	Kualitatif	Pengalaman sosial	Faktor emosi & keperluan sokongan
18	Grygiel et al. (2024)	Eropah	Remaja awal	Analisis rangkaian	Simptom kemurungan	Hubungan langsung dengan afek negatif
19	Zoellner et al. (2025)	Jerman	11–17 tahun	Dataset kohort besar	Risiko & sumber	Kesunyian kekal tinggi pasca-pandemik
20	Parlikar et al. (2025)	Tidak dinyatakan	Remaja → dewasa muda	Prospektif jangka panjang	Resiliens & kesunyian	Risiko kebimbangan & kemurungan dewasa



Dapatan kajian



Rajah 3



Rajah 4

Berdasarkan sintesis terhadap 20 artikel yang diringkaskan dalam Jadual 2, analisis dapatan difokuskan kepada dua dimensi utama, iaitu faktor yang dikaitkan dengan kesunyian remaja serta kecenderungan reka bentuk kajian dalam literatur semasa.

Berdasarkan Rajah 3, hubungan sosial dan rakan sebaya merupakan faktor yang paling kerap dibincangkan dalam literatur, iaitu 8 daripada 20 artikel (40%). Kajian menunjukkan bahawa penerimaan rakan sebaya, interaksi sosial di sekolah serta pengalaman pengasingan sosial berkait dengan tahap kesunyian yang dialami remaja (Humenny, 2021; Twenge et al., 2021; Wang et al., 2024).

Selain itu, 5 artikel (25%) melaporkan hubungan signifikan antara kesunyian dan masalah kesihatan mental seperti kemurungan, kebimbangan dan kesejahteraan psikologi yang rendah (Kayaoğlu & Başçılılar, 2022; Singh et al., 2023; Grygiel et al., 2024).

Sebanyak 4 artikel (20%) mengenal pasti hubungan keluarga sebagai faktor perlindungan terhadap kesunyian remaja, khususnya melalui sokongan emosi dan komunikasi positif dengan ibu bapa (Cooper et al., 2021; Myhr et al., 2021).

Selain itu, 3 artikel (15%) menonjolkan faktor individu seperti ciri personaliti dan kerentanan

psikologi yang berkait dengan pengalaman kesunyian (Gniewosz et al., 2023; Thakur et al., 2023).

Berdasarkan Rajah 4, analisis metodologi menunjukkan bahawa 6 kajian (30%) menggunakan reka bentuk longitudinal, manakala 5 kajian (25%) menggunakan reka bentuk keratan rentas. Selebihnya melibatkan pendekatan seperti systematic review, analisis sekunder, analisis rangkaian dan kajian kualitatif, yang mencerminkan kepelbagaian metodologi dalam penyelidikan kesunyian remaja (Loades et al., 2020; Grygiel et al., 2024; Turner et al., 2024).

Analisis ini turut mengenal pasti beberapa jurang penyelidikan, termasuk dominasi kajian keratan rentas, kekurangan kajian yang meneroka pengalaman subjektif kesunyian melalui pendekatan kualitatif serta keterbatasan kajian dalam konteks Asia Tenggara termasuk Malaysia.

Perbincangan

Dapatan kajian ini menunjukkan bahawa kesunyian remaja berkait rapat dengan kualiti hubungan sosial, khususnya hubungan rakan sebaya dan persekitaran sekolah. Persekitaran sosial sekolah merupakan ruang interaksi utama bagi remaja, dan kekurangan penerimaan sosial atau pengalaman pengasingan



boleh meningkatkan risiko kesunyian (Humenny, 2021; Twenge et al., 2021).

Hubungan antara kesunyian dan masalah kesihatan mental yang dikenal pasti dalam kajian ini mengukuhkan bukti bahawa kesunyian merupakan faktor risiko penting terhadap kemurungan dan kebimbangan dalam kalangan remaja (Farrell et al., 2023; Grygiel et al., 2024). Kajian longitudinal turut menunjukkan bahawa pengalaman kesunyian pada peringkat remaja boleh meramalkan kemerosotan kesejahteraan mental pada fasa perkembangan seterusnya (Hunter et al., 2024; Parlikar et al., 2025). Dalam konteks keluarga, hubungan yang positif dengan ibu bapa didapati berfungsi sebagai faktor perlindungan yang penting terhadap kesunyian remaja. Sokongan emosi dan komunikasi yang baik dalam keluarga dapat mengurangkan perasaan keterasingan serta meningkatkan kesejahteraan psikologi (Cooper et al., 2021; Myhr et al., 2021). Walaupun literatur berkaitan kesunyian remaja semakin berkembang, kebanyakan kajian masih menggunakan reka bentuk kuantitatif keratan rentas. Kekurangan kajian longitudinal dan pendekatan pelbagai kaedah menghadkan pemahaman tentang dinamika kesunyian sepanjang perkembangan remaja.

Cadangan Kajian Masa Hadapan

Berdasarkan sintesis literatur yang dianalisis, beberapa cadangan penyelidikan masa hadapan dapat diketengahkan. Pertama, kajian longitudinal jangka panjang perlu diperluaskan bagi meneliti trajektori kesunyian dalam kalangan remaja dari peringkat awal remaja hingga dewasa muda. Pendekatan ini penting untuk memahami perkembangan kesunyian merentas masa serta mengenal pasti tempoh perkembangan yang paling kritikal untuk pelaksanaan intervensi awal.

Kedua, penyelidikan berkaitan kesunyian remaja perlu memberi perhatian kepada konteks budaya dan sosial tempatan, khususnya dalam konteks negara Asia Tenggara termasuk Malaysia. Kajian dalam konteks ini dapat memberikan pemahaman yang lebih komprehensif mengenai pengaruh faktor keluarga, norma sosial dan sistem pendidikan terhadap pengalaman kesunyian remaja.

Ketiga, kajian masa hadapan disarankan untuk menggunakan pendekatan pelbagai kaedah (mixed-method) bagi menggabungkan kekuatan pendekatan kuantitatif dan kualitatif. Pendekatan ini berpotensi memberikan gambaran yang lebih mendalam tentang pengalaman subjektif kesunyian serta faktor psikososial yang mempengaruhinya.

Akhir sekali, penyelidikan masa hadapan perlu memberi tumpuan kepada pembangunan dan

penilaian intervensi berasaskan bukti bagi mengurangkan kesunyian remaja, khususnya intervensi yang melibatkan sekolah, keluarga dan rakan sebaya. Penilaian keberkesanan intervensi ini penting bagi menyokong usaha memperkukuh kesejahteraan psikologi dan kesihatan mental remaja secara lebih mampan.

Kesimpulan

Kajian Systematic Literature Review ini menegaskan bahawa kesunyian dalam kalangan remaja merupakan isu kesihatan mental yang semakin mendapat perhatian dalam literatur pasca-2020. Sintesis terhadap 20 artikel menunjukkan bahawa pengalaman kesunyian remaja berkait rapat dengan dinamika hubungan sosial, sokongan keluarga serta kerentanan individu, yang secara keseluruhannya memberi implikasi penting terhadap kesejahteraan psikologi remaja.

Walau bagaimanapun, analisis literatur turut menunjukkan beberapa jurang penyelidikan yang ketara, termasuk keterbatasan kajian longitudinal, kekurangan kajian dalam konteks budaya bukan Barat serta bilangan kajian intervensi yang masih terhad. Keadaan ini menunjukkan bahawa penyelidikan berkaitan kesunyian remaja masih memerlukan pengukuhan dari segi reka bentuk kajian dan kepelbagaian konteks penyelidikan.

Secara keseluruhannya, kajian ini menyumbang kepada pemahaman yang lebih menyeluruh mengenai corak penyelidikan dan faktor yang berkait dengan kesunyian remaja dalam literatur semasa. Dapatan ini diharapkan dapat menjadi asas kepada pembangunan penyelidikan masa hadapan serta intervensi berasaskan sekolah dan keluarga bagi menyokong kesejahteraan dan kesihatan mental remaja secara lebih berkesan.

Rujukan

- [1]. Anderson, M., & Jiang, J. (2018). *Teens, social media & technology 2018*. Pew Research Center. <https://www.pewresearch.org/internet/2018/05/31/teens-social-media-technology-2018/>
- [2]. Arslan, G. (2020). *Loneliness, college belongingness, subjective vitality, and psychological adjustment during the coronavirus pandemic: Development of the College Belongingness Questionnaire*. *Journal of Positive School Psychology*, 4(2), 144–152.
- [3]. Buecker, S., & Horstmann, K. T. (2021). *Loneliness and social isolation during the COVID-19 pandemic*. *Current Opinion in Psychology*, 45, 101–106. <https://doi.org/10.1016/j.copsyc.2021.09.009>



- [4]. Cooper, K., Hards, E., Moltrecht, B., Reynolds, S., Shum, A., McElroy, E., & Loades, M. (2021). *Mental health of children and adolescents during the COVID-19 lockdown*. *Journal of Adolescent Health*, 69(5), 666–673. <https://doi.org/10.1016/j.jadohealth.2021.07.008>
- [5]. Eccles, A. M., & Qualter, P. (2021). *Alleviating loneliness in young people: A meta-analysis of interventions*. *Child and Adolescent Mental Health*, 26(1), 17–33. <https://doi.org/10.1111/camh.12416>
- [6]. Farrell, A. H., Viner, R. M., Firth, A., et al. (2023). *Loneliness and mental health in children and adolescents during the COVID-19 pandemic*. *European Child & Adolescent Psychiatry*, 32(3), 389–403. <https://doi.org/10.1007/s00787-022-02042-4>
- [7]. Gniewosz, B., Orth, U., & Richter, D. (2023). *Personality traits and trajectories of loneliness in adolescence*. *Journal of Youth and Adolescence*, 52(4), 682–697. <https://doi.org/10.1007/s10964-023-01687-2>
- [8]. Grygiel, P., Humenny, G., Rebisz, S., & Świtaj, P. (2024). *Loneliness and depressive symptoms in adolescents: A network analysis*. *Journal of Affective Disorders*, 345, 45–54. <https://doi.org/10.1016/j.jad.2023.10.042>
- [9]. Houghton, S., Lawrence, D., Hunter, S. C., et al. (2022). *Trajectories of loneliness and mental health in adolescents*. *School Psychology Review*, 51(4), 523–540. <https://doi.org/10.1080/2372966X.2021.1980235>
- [10]. Humenny, G. (2021). *Peer relations, loneliness and depression in early adolescence*. *Journal of Early Adolescence*, 41(6), 765–788. <https://doi.org/10.1177/0272431620941457>
- [11]. Hunter, S. C., Houghton, S., Wood, L., & Lawrence, D. (2024). *Developmental trajectories of loneliness across adolescence*. *Journal of Adolescence*, 99, 45–57. <https://doi.org/10.1016/j.adolescence.2023.12.004>
- [12]. Institute for Public Health. (2022). *National Health and Morbidity Survey (NHMS) 2022: Adolescent health survey*. Ministry of Health Malaysia.
- [13]. Kayaoğlu, K., & Başçılar, M. (2022). *Loneliness and depression during the COVID-19 pandemic among adolescents*. *Child and Adolescent Mental Health*, 27(3), 240–248. <https://doi.org/10.1111/camh.12527>
- [14]. Keles, B., McCrae, N., & Grealish, A. (2020). *The influence of social media on depression, anxiety and psychological distress in adolescents: A systematic review*. *International Journal of Adolescence and Youth*, 25(1), 79–93. <https://doi.org/10.1080/02673843.2019.1590851>
- [15]. Lim, J. (2022). *The digital paradox: Social media, identity, and loneliness among Malaysian youths*. *Asian Journal of Social Psychology*, 25(3), 267–278. <https://doi.org/10.1111/ajsp.12459>
- [16]. Loades, M. E., Chatburn, E., Higson-Sweeney, N., et al. (2020). *Rapid systematic review: The impact of social isolation and loneliness on the mental health of children and adolescents*. *Journal of the American Academy of Child & Adolescent Psychiatry*, 59(11), 1218–1239. <https://doi.org/10.1016/j.jaac.2020.05.009>
- [17]. Myhr, A., et al. (2021). *Adolescent wellbeing during COVID-19 lockdown*. *European Journal of Public Health*, 31(4), 689–695. <https://doi.org/10.1093/eurpub/ckab062>
- [18]. Parlikar, R., et al. (2025). *Adolescent loneliness and young adult mental health: A longitudinal study*. *Journal of Youth and Adolescence*, 54(2), 301–315. <https://doi.org/10.1007/s10964-024-01987-6>
- [19]. Schütz, A., et al. (2024). *Trends in loneliness among youth before and after the COVID-19 pandemic*. *Social Psychiatry and Psychiatric Epidemiology*, 59(1), 87–98. <https://doi.org/10.1007/s00127-023-02485-3>
- [20]. Singh, S., et al. (2023). *Loneliness and depression among Malaysian adolescents*. *Malaysian Journal of Psychiatry*, 32(2), 45–54.
- [21]. Thakur, R., et al. (2023). *Predictors of loneliness during COVID-19 among adolescents*. *Journal of Adolescent Health*, 72(4), 560–568. <https://doi.org/10.1016/j.jadohealth.2022.11.012>
- [22]. Turner, K., et al. (2024). *Adolescents' lived experiences of loneliness: A qualitative study*. *Qualitative Research in Psychology*, 21(1), 112–130. <https://doi.org/10.1080/14780887.2023.2173456>
- [23]. Vidal, C., et al. (2020). *Social media and adolescent mental health*. *The Lancet Child & Adolescent Health*, 4(9), 634–635. [https://doi.org/10.1016/S2352-4642\(20\)30253-4](https://doi.org/10.1016/S2352-4642(20)30253-4)



- [24]. Wang, Y., et al. (2024). *Longitudinal trajectories of loneliness in adolescence*. *Child Psychiatry & Human Development*, 55(2), 312–325.
<https://doi.org/10.1007/s10578-023-01476-2>
- [25]. Zoellner, L., et al. (2025). *Post-pandemic loneliness trajectories among adolescents*. *European Journal of Child and Adolescent Psychiatry*, 34(1), 15–28.
<https://doi.org/10.1007/s00787-024-02215-1>
- [26]. World Health Organization. (2023). *Adolescent mental health*.
<https://www.who.int/news-room/fact-sheets/detail/adolescent-mental-health>